

# In dom recepì en il patrimoni mundial

L'ierta multifara d'ina claustra medievala

DA GUIU SOBIELA-CAANITZ

■ **Dapi 2008 stattan las viafiers reticas da l'Alvra e dal Bernina en la glista da l'Unesco davart il patrimoni mundial.**

**Lezza cumpiglia dentant era baselgias medievalas.** L'emprim da fanadur ha il comite da l'Unesco recepì il dom da Naumburg (Saale), situà en il «Bundesland» tudestg da Saxonia-Anhalt. Maria Böhmer, parsura da la cumissiun tudestga da l'Unesco, punctuescha: «Lez dom, cun ses claustrigl, sia structura dubla, ses iert ed ils bajetgs limitrofs, è in excellent complex architectonic da la romanica tardiva e da la gotica tempriva. L'entir mund enconuscha las ovras da l'uscheditg maister da Naumburg, numnadamain las impressiunantas figuras dal chor dal vest, sco [la marchesa] Uta, e la lautga da spartida encunter vest cun ils reliefs da la Passiun» (1). En la citad da Naumburg (32'784 olmas il 2016) residia in uvestg dapi l'indeschavel tschientaner enfin a la reformaziun. Pir en il 13avel ha il maister represententà quels fundaturs da l'uestgiu. Las duas figuras las pli renumadas èn marches Ekkehard da Meißen (oz en il «Freistaat» da Saxonia), mort il 1046, e sia dunna Uta, naschida enturn il 1000 sco contessa da Ballenstedt (oz en Saxonia-Anhalt). «Ekkehard è represchentà sco caracter decidi e conscient da sia pussanza; era ses sguard è decidi. El para (...) da savair tge ch'el vul, (...) sco in um ferm ed energetic, dentant era segir e dir (...). Uta, parenta dals imperaturs, derivava dal'auta noblezza (...). Ella porta ina schlappa surdorada e sisura ina pumpusa curuna da gilgia (...). Ina broscha gronda sin il pèz tegna ensemen la vestgadira» (2).

## Gimnasi e vignas da qualitat

La decisiun da l'Unesco a favur da Naumburg vegn segir a promover il turissem en la regiun dal flum Saale. Ma questa è gia renumada per in motiv tuttafatg different. Ina fracziun da Naumburg ha num oz Schulpforte (pli baud Schulpforta). 1137 ha l'uestg da Naumburg fundà la «Claustrum Sanctae Mariae ad Portam» sco «monasterium Cisterciensis ordinis



Il dom da Naumburg.

MAD

apud Portam». Lez ha promovì la viticultura, necessaria per celebrar la messa cun vin. La reformaziun, la guerra da trent'onns e la fillossera han manà a renunziar a la viticultura en bunamain l'entira Germania dal nord. 1543 ha il prinzi electoral protestant Moritz da Saxonia (1521-1553) fundà la «Fürstend- und Landesschule Pforta» en ils anteriurs bajetgs da la claustra cisterziensa. En il 19avel tschientaner ha Pforta scolà giuven talentads sco Leopold von Ranke (1795-1886) e Friedrich Nietzsche (1844-1900). Il gimnasi exista anc adina sco «Landesschule» da la Saxonia-Anhalt. In'ierta da la claustra medievala è la viticultura en la regiun da la Saale e da ses flum lateral l'Unstrut, pia en la Saxonia-Anhalt dal sid e la Turinga (stadi liber) dal nord. «Las vignas han ina surfatscha totala da var 600 ha (...). L'entir intschess è situà a nord dal 50avel grad da ladezza [quel da Prag, Magonza e Frankfurt am Main]; lez vala generalmain sco cunfin nord da la viticultura. Sper Saale ed Unstrut pon ins tuttina producir vins excel-

lents en singuls lieus climaticamain favuravels. Las meglieras vits, cunzunt las alvas temprivas, prospereschan sin las rivas da la Saale, da l'Unstrut e da l'Ilm [flum lateral da l'Unstrut] (...). Il center da la viticultura sper l'Unstrut è la citad da Freyburg [4748 olmas, en Saxonia-Anhalt] (...). La specia principala da vit è Müller-Thurgau; lura vegnan Weissburgunder e Sylvaner (...). Ils vins cotschens n'èn betg impurtants; il principal è il Portugais blau, ins dovra però pauc sias ivas per producir vin cotschen, mabain cunzunt per sect da la marca ‚Rotkäppchen‘ [da Freyburg]. Dapi var 20 onns bad'ins però la tendenza da cultivar savens specias da vit che dattan vins cotschens, sco Schwarzriesling, Trollinger u Zweigelt» (3). Tgi che vegn a visitar il dom da Naumburg na sto pia betg murir da la said.

1. <https://www.unesco.de/kultur-und-natur/welterbe-deutschland/naumburger-dom.im-dritten-anlauf-unesco>
2. Naumburger Stifterfiguren - Wikipedia
3. <https://www.lebensmittellexikon.de/s0003270.php>